

Mi colega ta casa awe..."E pober na sa den kico el a hinca su curpa"

Algun aña pasa, sinta na mesa cu mi señora, durante celebracion di Pasco di DIARIO, nos tabata tin compania di colega Randy cu poco tempo prome a cuminsa traha na DIARIO.

E tabata den compania di un juffrouw "verlegen" asina.

Ora el a introduci su mes, mi a bisa e juffrouw: **"comportabo cu Randy sino mi ta bisa bo tata tur cos"**.

El a keda asombra cu mi tabata conoce su tata. Cu otro palabranan, cu mi sa kende e ta.

Algun dia despues na DIARIO, atami a topa cu juffrouw atrobe.

E biaha aki su lenga a los poco mas, y el a puntrami: **"Jubilaar, con bo faam ta?"**

Awe e juffrouw ta bira señora di Randy.

Tres dia pasa mi a puntra Randy si e ta cla pa casa y el a contesta cu, si.

Mi a puntre si e sa di dos nomber di e juffrouw, su fecha, lugar y aña di nacimiento.

El a puntra di con mi kier sa esey.

"Ta pa mi sa si bo ta cla pa casamento", mi a laga sa y agrega: **"no lubida cu mi ta un experto certifica di casamento (EcdC)."**

Mi ta considera mi mes un EcdC pasobra mi tin mas di 5 aña casa, y ainda mi ta cu e mes casa y ta kere cu e kier keda soportami poco mas.

No tin hende mas fastioso cu mi. **"Con e por?"**

Randy por a contesta mi pregunta corecto, y mi a haya cu e ta cla pa casa.

El a harimi den mi cara ora cu mi a laga sa cu mi ta un experto.

Pero ta tur hende ta harimi tambe.

FREIMENTO Y DESPUES CASAMENTO

E periodo di **"freimento"** mi ta haya, cu ta determina e eventual exito di un matrimonio.

E periodo aki por dura hasta algun aña, of hasta algun cervex cortico.

Si un di e pareha por contesta e preguntanan menciona ariba corectamente, nan ta den bon caminda.

Despues di tanto tempo ta frei, e pareha por dicidi di casa.

Awendia hopi enfasis ta ser poni riba e ceremonia y e sacrificio di planea e matrimonio.

Ta bon pa corda semper cu e dia di matrimonio ta dura solamente un dia, pero e matrimonio mes ta dura henter bo bida.

Nota: Esaki ta un nota pa e joncuman.

Mihor bo ripiti loke mi a skirbi aki riba, na lugar di sclama: **"300 florin pa un maldito bolo chiquito asina?"**

Si e tene e filosofia aki na mente, ta keda toch un bon idea pa e casa. Estudio y investigacionnan cu expertonan manera ami a haci, a determina cu **"casi tur pareha felizmente casa, a participa por lo menos un biaha den un matrimonio, nan matrimonio."**

Percura pa dia bo casa, bo tin un sapato comodo bisti pasobra ta hopi bo tin cu "para."

Pa pasa luna de miel, sali di Aruba, y bay keda den cualquier hotel barata den exterior.

Ningun hende sa toch unda boso a bay.

Come desayuno barata mainta, hamburger merdia, pizza anochi.

Ora bo bolbe Aruba, bo señora lo demostrabo kico ta un bon cuminda.

Esey ta si e por prepara algo otro cu no ta un webo kima.

Durante luna de miel, tene bo señora contento cu: **"Dushi, mi ta primintibo cu despues di nos luna de miel, ta bon so tur cos lo bira pa nos"**.

Pa tur e añanan cu ta bo dilanti, bo por sigui priminti'e e mes cos tur dia. Ta bo señora e ta, e ta compronde pa bo.

DEN MATRIMONIO, HOPI DISCUSION TAMBE

Ultimo diez aña riba nos isla, nos a haya masha experto riba asunto di problemanan matrimonial.

Bota haya un cu ta recomenda con bo por gasta placa menos y toch keda bashi fin di luna, despues cu bo a cobra.

Otro cu ta splica con bo no mester maltrata bo casa.

Tambe tin expertonan cu ta consehabo con bo ta spaar placa pagando alimentacion pa yiu.

Tin hopi experto cu sa exactamente di con **"ainda bo tin oreo"** y con pa **"cuida bo oreo"**.

Tin experto cu ta experto mes **"di carnaval"** y keto bay ta imagina cu e ta mirabo **"cu cacho"** riba bo cabez.

Y pa no lubida expertonan principal cu ta siñabo con pa gaña y tene bo casa feliz y contento.

Ami lo recomenda pa lesa e buki cu ainda mi tin cu skirbi y cu lo ser titula: **"Con pa termina un pleitamento cu e bestia, animal, fastioso, sinvergüenza, mentiroso cu nunca mi mester a casa cune na prome lugar, y cu ta ser yama mi casa"**.

Pa bisa berdad, tur pleito y discusion por termina cu 7 palabra simpel: **"Ta mi falta. Laga nos kita paña"**.

E MALDITO PLACA DEN MATRIMONIO

No tin algo cu ta trece mas pleitamento y discusion cune den un matrimonio, cu **"placa, placa y placa."**

E mihor conseho cu mi por duna ta: **"Percura cu bo ta gana asina tanto placa cu nunca bo mester discuti pa motibo di falta di placa."**

Mi experticio ta pone cu mi por hasta conseha hobennan: **"No pensa mes den casamento riba e isla aki si bo no tin diploma di abogado, docter, especialista, of ciruhano. Of si di repente bo a hereda un fortuna di un tata cu bo nunca a conoce y cu tabata un magnate na Venezuela of Colombia"**. (Ta pesey mama tabata bay docter hopi den e pais ey, 8 biaha pa aña?)

E romance, e briyo di e relacion ta baha tambe mientras añanan ta pasando.

E intriga y novedad di intimidad ta bira familiar y e aventura cu e tabata, a bira rutina fastioso.

Ni momentonan special di romance no ta logra hinca mas den e matrimonio y e excitacion ta **"baha"**.

LOKE TA ROBEZ: **"Tende, no sperami trempa awe nochí, mi ta na cas di Coneeuw, mi colega."**

LOKE TA CORECTO: **Dushi, mi ta bin cas poco laat awe nochí. Mi ta bay cas di mi colega Coneeuw. Bo ta desea pa mi busca algo dushi pabo come of bebe?"**

Bo ta mira? un poco esfuerzo lo tene tur hende contento.

Mi amigo Randy, bo ta sigui mi consehonan?

Ainda bo tin algun ora pa dicidi si bo ta bisa **"Si"** of keda riba un **"No!"**

ATA E YIUNAN Y E SUEGRO OF SUEGRA

Si bo ta casa suficiente tempo, inevitablemente boso lo considera si mester bin un, of un dozijn, di yiu.

Corda bon, cu esaki lo no lijn bo matrimonio si e ta na caminda di scheur of kibra.

Si bo ta kere cu boso lo stima otro mas, si un yiu nace, djies imaginabo kico kiermeen carga e criatura 3 or di madrugada den bo brazu y el a dunabo **"un baña di sacramento."**

Y esaki na momento cu ni abo ni bo casa 6 siman caba no a logra cera un wowo.

Si bo ta kere cu bo por ta un casa yen di stimacion bao di e circunstancianan aki, bo lo bira un bon mayor (aunke bo sa cu bo ta gaña bo mes).

E otro punto di importancia ta bo suegro y suegra.

Si bo no ta sali bon cu nan, mi ta conseha pa bo bay biba na Australia, pasobra eynan si tin ley den cual suegro of suegra no por mishi cu nada den bo cas, ni cambia nada den bo cas, sin bo permiso.

Si nan haci esey nan ta termina den prison.

Si ta mucho caro pa haci e biahe, cumpra algo mas barata pa regala nan.

Por ehemplo un coyar cu **"sensor di rayonan tranquilisante"**, cu awendia nan ta bisti cachonan.

E ta tene bo suegro y suegra calmo, tranquil, henter e periodo cu nan tin e bisti.

Otro bon conseho ta: **"Nunca haci chansa di bo suegra si bo ta riba pantaya di television."**

Un nota pa mi suegra: **"Esaki no ta aplica pa Mama. Mama ta maraviyoso!"**

Juby Naar